



DEPUTACIÓN PROVINCIAL
A CORUÑA

SERVIZO DE PATRIMONIO E CONTRATACIÓN



CONFEDERACION
DE EMPRESARIOS
DE LA CORUÑA

Número 25 /2026

CONVENIO DE COLABORACIÓN ENTRE A EXCELENTÍSIMA DEPUTACIÓN PROVINCIAL DA CORUÑA E A CONFEDERACIÓN DE EMPRESARIOS DA CORUÑA PARA FINANCIAR O PROXECTO “IMPULSA CORUÑA” DENTRO DO PROGRAMA DE FOMENTO DA ACTIVIDADE EMPRESARIAL DA PROVINCIA, NO MARCO DO PLAN DE EMPREGO LOCAL (PEL).

Na Coruña, a 9 de marzo de 2026, na sede da Deputación Provincial da Coruña.

Ante min, Miguel Iglesias Martínez, Secretario Xeral da Deputación Provincial da Coruña, como fedatario actuante

REUNIDOS

Dunha parte, Don Valentín González Formoso, Presidente da Excelentísima Deputación Provincial da Coruña

E doutra parte, Don Antonio Javier Fontenla Ramil, Presidente da Confederación de Empresarios da Coruña,

Actuando no exercicio dos seus respectivos cargos e na representación que ostentan, e recoñecéndose reciprocamente capacidade para obrigarse nos termos deste documento

MANIFESTAN

Que a Excelentísima Deputación provincial da Coruña e a Confederación de Empresarios da Coruña, consideran que o impulso ao emprendemento e a consolidación empresarial é crucial para o desenvolvemento económico, social e competitivo da provincia. Esta iniciativa non só xera emprego e promove a diversificación económica, senón que tamén fortalece a economía a nivel local e provincial sendo especialmente beneficiosa para os municipios máis pequenos, xa que contribúe ao seu desenvolvemento e atrae talento e investidores.

Que ao ofrecer oportunidades laborais e empresariais en áreas rurais, fomenta que a poboación opte por quedar a vivir nestas zonas, enriquecendo así a vida comunitaria e preservando a contorna rural. O apoio ao emprendemento e a consolidación empresarial na provincia non só beneficia á provincia no seu conxunto, senón que tamén ten un impacto positivo no desenvolvemento e a sustentabilidade dos municipios máis pequenos e na retención de poboación no ámbito rural.

Que dado o interese coincidente da Deputación da Coruña e da Confederación de empresarios da Coruña, no marco dos seus fins e competencias, as dúas partes acordan subscribir un convenio conforme ás seguintes

CLÁUSULAS

I.- OBXECTO

O presente convenio ten por obxecto establecer as bases de colaboración entre a Deputación da Coruña e a Confederación de Empresarios da Coruña, NIF: G15029960, para o financiamento do proxecto “**Impulsa Coruña**” dentro do programa de Fomento da actividade empresarial na provincia cuxo obxectivo é apoiar e promocionar o emprendemento e a actividade empresarial.

O seu obxectivo é impulsar o desenvolvemento sustentable da provincia, situando ás persoas no centro, mediante a identificación de necesidades e oportunidades no tecido empresarial e emprendedor. Isto permite fomentar o crecemento económico e empresarial a través dun asesoramento e unha formación axeitados dirixidos á poboación das comarcas de Bergantiños, Terra de Soneira, Fisterra, Comarca de Ordes, Comarca das Mariñas, A Coruña, Comarca do Eume, Ortegal e Ferrol.

O proxecto ten como finalidade realizar un diagnóstico da situación actual da provincia para identificar necesidades e oportunidades nos sectores estratéxicos, fomentar o emprendemento e o crecemento empresarial, especialmente entre PEMES, micropemes e persoas autónomas, así como deseñar e implementar accións de capacitación adaptadas ás demandas reais do mercado.

Ademais, inclúe a mentorización e acompañamento de persoas emprendedoras, a xeración de entregables que impulsen novas actuacións, e o contacto con entidades financiadoras para promover proxectos viables e sustentables.

II.- ORZAMENTO DE GASTOS DA ACTIVIDADE A REALIZAR

A Confederación de Empresarios da Coruña levará a cabo as actividades do programa, segundo se definen na cláusula anterior, consonte ao seguinte orzamento:

GASTOS		IMPORTE
COMPRAS DE BENS DESTINADOS Á ACTIVIDADE		3.591,76 €
ARRENDAMENTOS		
Arrendamentos de locais	2.242,40 €	42.317,60 €
Arrendamentos plataforma, licenzas e equipamentos	40.075,20 €	
REPARACIÓNS E CONSERVACIÓN		2.033,87 €
CONTRATACIÓNS EXTERNAS		
Servizos de organización, dinamización de eventos/actos/mesas participativas	19.844,00 €	
Servizos de comunicación e marketing, etc.	6.050,00 €	88.993,80 €
Servizos de prospección, promoción e captación de participantes	23.199,80 €	
Orientación, tutorías e mentoring	12.000,00 €	
Servizos de formación/Docencia/Impartición	27.900,00 €	
PUBLICIDADE E PROPAGANDA		6.558,20 €
GASTOS XERAIS: SUBMINISTRACIÓNS		1.687,29 €
GASTOS XERAIS: COMUNICACIÓNS		738,00 €

GASTOS		IMPORTE
GASTOS DE PERSOAL: SOLDOS E SALARIOS		
Persoal de coordinación	13.975,40 €	96.897,88 €
Persoal técnico de proxectos	59.724,54 €	
Persoal administrativo	23.197,94 €	
GASTOS DE PERSOAL: SEGURIDADE SOCIAL		
Persoal de coordinación	4.502,80 €	26.705,22 €
Persoal técnico de proxectos	19.385,52 €	
Persoal administrativo	2.816,90 €	
DESPRAZAMENTOS: GASTOS DE MANUTENCIÓN, AVITUALLAMENTO, VIAXES E ALOXAMENTO		2.476,38 €
PREMIOS PARA O DESENVOLVEMENTO DA ACTIVIDADE DE EMPRENDEMENTO		8.000,00 €
TOTAL GASTOS		280.000,00 €
Importe cofinanciado pola Deputación Provincial (80 %)		224.000,00 €
Importe cofinanciado pola CEC (20 %)		56.000,00 €

III.- FINANCIAMENTO PROVINCIAL E OUTROS INGRESOS QUE SE OBTENAN OU ACHEGUEN PARA A MESMA FINALIDADE

1. A Deputación da Coruña contribuirá ao financiamento da actividade, tal como se define na cláusula primeira, cunha achega máxima de **224.000.00 €**, o que representa unha porcentaxe do **80%** do custo do proxecto. No caso de que o gasto xustifico non acadase o importe total previsto na cláusula segunda, a Deputación só achegará o importe que represente o 80% da cantidade efectivamente xustificada.
2. Agora ben, se a cantidade xustificada resulta inferior ao 75 por cento do orzamento previsto na cláusula segunda, entenderase que a finalidade básica da subvención non foi cumprida e perderase o dereito ao seu cobro.
3. O importe do financiamento provincial farase efectivo con cargo á aplicación orzamentaria 0520/24100/481 na que a Intervención provincial ten certificado que existe crédito dabondo sobre a que se ten contabilizado a correspondente retención de crédito.
4. A subvención da Deputación é compatible coa percepción doutras subvencións ou axudas, públicas ou privadas, que a entidade beneficiaria obteña para a mesma finalidade, sempre que o seu importe, xuntamente co da subvención provincial, non supere en ningún caso o importe total do gasto efectivamente xustifico.
5. No caso de que a concorrencia de axudas ou subvencións supere o importe do gasto efectivamente xustifico, minorarase a aportación provincial no importe necesario para darlle estrito cumprimento ao apartado anterior.

IV.- CONTRATACIÓN E EXECUCIÓN

1. O outorgamento dos contratos de servizos, asistencia ou subministración necesarios para a execución da actividade corresponderalle á Confederación de Empresarios da Coruña. Non se poderá contratar a realización de prestacións con persoas ou entidades vinculadas á Confederación, nin con calquera outra na que conorra algunha das circunstancias ás que se refire o artigo 29.7 da Lei 38/2003, do 17 de novembro, xeral de subvencións.
2. Se o importe dalgunha das prestacións supera os 15.000 euros, con carácter previo á contratación, a Confederación de Empresarios da Coruña deberá solicitar alomenos tres orzamentos a distintos provedores. Entre as ofertas recibidas, deberase elixir unha delas de acordo con criterios de eficiencia e economía, debendo xustificarse expresamente nunha memoria a elección cando non recaia sobre a oferta máis vantaxosa economicamente

V.- PUBLICIDADE DO FINANCIAMENTO PROVINCIAL

1. Na publicidade pola que se dea a coñecer a realización das actividades, ben sexa por medios escritos, radiofónicos, audiovisuais ou internet, deberase facer constar sempre o financiamento da Deputación Provincial da Coruña e se utilizará o logo oficial do Plan de Emprego Local dispoñible na web: <https://emprego.dacoruna.gal/>.
2. Coa memoria e conta xustificativa, achegaranse os documentos que acrediten o cumprimento destas obrigas por parte da Confederación de Empresarios da Coruña.

VI.- XUSTIFICACIÓN NECESARIA PARA RECIBIR A ACHEGA PROVINCIAL

A achega da Deputación seralle abonada á Confederación de Empresarios da Coruña unha vez que se presente a seguinte documentación:

- Memoria de actuación subscrita polo representante legal da Confederación, xustificativa do cumprimento das condicións impostas neste convenio, coa indicación das actividades realizadas e dos resultados obtidos.
- Relación clasificada dos gastos realizados, no que se indiquen os acredores co seu NIF, os documentos xustificativos, os importes e, no seu caso, datas de pago. Tamén se indicarán as desviacións con respecto ao orzamento detallado na cláusula SEGUNDA. Con esta relación achegaranse os orixinais ou copias debidamente compulsadas das facturas e demais xustificantes de gasto. No caso de que se presenten copias compulsadas, con carácter previo á compulsas deberá estenderse unha dilixencia sobre o orixinal na que se deixo constancia de que foi presentada como xustificante de gasto para o cobro dunha subvención outorgada pola Deputación da Coruña.
- Certificación da aprobación das facturas e demais documentos xustificativos polo órgano competente.
- Acreditación do cumprimento das obrigas tributarias e coa Seguridade Social, segundo o previsto na cláusula OITAVA.
- Declaración doutras axudas ou subvencións solicitadas ou concedidas para a mesma finalidade.
- Certificación da conta bancaria, segundo o modelo aprobado pola Deputación.
- Proba do cumprimento das obrigas asumidas na cláusula QUINTA, mediante a aportación de documentos nos que conste a publicidade do financiamento provincial.

O aboamento da contía da subvención materializarase mediante o ingreso na conta da entidade financeira indicada pola Confederación de Empresarios da Coruña na documentación achegada.

VII. TERMO PARA A REALIZACIÓN DA ACTIVIDADE E PRAZO DE XUSTIFICACIÓN

1. As actividades que son obxecto de financiamento provincial, **deberán realizarse no período dun ano desde o día seguinte á sinatura do presente convenio.**
2. Unha vez rematadas as actividades, a Confederación de Empresarios da Coruña deberá presentar a xustificación documental á que se refire a cláusula SEXTA **antes do vencemento do período de vixencia do convenio establecido na cláusula DÉCIMO TERCEIRA, é dicir, do 31 de xullo de 2027.**
3. De conformidade co disposto no artigo 70.3 do Regulamento da Lei de subvencións (Real decreto 887/2006, do 21 de xullo), transcorrido este prazo sen que se teña recibido xustificación ningunha, a unidade xestora remitiralle un requirimento á Confederación de Empresarios da Coruña para que a presente no prazo improrrogable de QUINCE DÍAS. A falla de xustificación da subvención neste prazo excepcional dará lugar á perda da subvención e demais responsabilidades previstas neste convenio e na lexislación aplicable ao respecto. Aínda así, a presentación da xustificación neste prazo adicional non eximirá á entidade da sanción que, de conformidade co disposto na Lei de subvencións e na Lei de subvencións e na ordenanza provincial de desenvolvemento que resulte aplicable, lle poida corresponder.
4. O aboamento da subvención materializarase mediante ingreso na conta da entidade financeira indicada pola Confederación de Empresarios da Coruña na documentación achegada.

VIII.- ACREDITACIÓN DO CUMPRIMENTO DAS OBRIGAS TRIBUTARIAS E COA SEGURIDADE SOCIAL

1. A Confederación de Empresarios da Coruña deberá acreditar, con carácter previo á sinatura deste convenio e logo, con carácter previo ao pago da subvención, que se atopa ao día no cumprimento das obrigas tributarias coa Administración do Estado, coa Comunidade autónoma e coa Seguridade Social. E para tal fin poderá autorizar á Deputación a que obteña telematicamente os correspondentes certificados.
2. A acreditación do cumprimento das obrigas tributarias coa Deputación Provincial determinarse de oficio por esta.

IX.- DESTINO E MANEXO DOS FONDOS RECIBIDOS

1. A Confederación de Empresarios da Coruña destinará os fondos recibidos ao pagamento dos xustificantes de gasto presentados.
2. Co fin de garantir un axeitado control da aplicación dos fondos, o pagamento deberá quedar acreditado documentalmente mediante a utilización de transferencia bancaria, tarxeta de débito ou crédito, cheque nominativo ou calquera outro medio que deixe constancia da data de pago e da identidade do perceptor. Só excepcionalmente se poderá realizar o pago en metálico para gastos de ata 150,00€, nos que non resulte posible a utilización dun dos medios anteriormente indicados.
3. Sen prexuízo dos libros e rexistros contábeis que as normas xerais ou sectoriais lle poidan impor, a Confederación de Empresarios da Coruña deberá contar polo menos cun rexistro cronolóxico de cobros e pagamentos nos que se inclúan, entre outros, os relativos aos gastos xustificadas e aos ingresos declarados con respecto a esta subvención.

X.- CONTROL FINANCIERO DA DEPUTACIÓN E DOS ÓRGANOS DE CONTROL EXTERNO.

1. Consonte ao disposto nos artigos 44 e seguintes da Lei 38/2003, de 17 de novembro, xeral de subvencións, e nos artigos 41 e seguintes da Lei 9/2007, de 13 de xuño, de Subvencións de Galicia, a Confederación de Empresarios da Coruña poderá ser escollida pola Intervención provincial para a realización dun control financeiro sobre a subvención pagada, co fin de acreditar a efectiva aplicación dos fondos á finalidade para a que foron concedidos, o correcto financiamento da actividade e o cumprimento de tódalas demais obrigas formais e materiais que lle impón o presente convenio de colaboración.

2. Asemade, de acordo co previsto na lei 6/1985, de 24 de xuño, do Consello de Contas de Galicia, a Confederación de Empresarios da Coruña queda sometida aos procedementos de fiscalización que leven a cabo o Consello de Contas de Galicia ou, no seu caso, segundo o previsto na Lei orgánica 2/1982, de 12 de maio, aos procedementos de axuízamento contable que poida incoar o Tribunal de Contas, e a calquera outro órgano de control, nacional ou europeo.

XI.- REINTEGRO, INFRACCIÓNS E SANCIÓN.

1. O incumprimento dalgunha das cláusulas previstas no presente convenio de colaboración poderá dar lugar a obriga de reintegro parcial ou total dos fondos recibidos, así como ao pago dos xuros de demora que se devindiquen desde o día no que se realizou o pago ata o momento no que se acorde a procedencia do reintegro. O procedemento de reintegro iniciárase de oficio na súa tramitación seguirase o disposto nos artigos 41 e seguintes do seu Regulamento (R.D. 887/2006, do 21 de xullo), dándolle en todo caso audiencia ao interesado.

2. Sen prexuízo do anterior, o dito incumprimento tamén poderá ser constitutivo dalgunha das infraccións tipificadas na Lei 38/2003, de 17 de novembro, ou na Lei 9/2007, de 13 de xuño, de subvencións de Galicia, séndolle de aplicación o cadro de sancións previstos nas normas citadas e na ordenanza provincial de desenvolvemento que resulte aplicable.

3. Para os supostos de retraso na realización das actividades ou retraso na presentación da xustificación se estará ao disposto na ordenanza provincial de desenvolvemento que resulte aplicable.

XII.- INCORPORACIÓN AO REXISTRO PÚBLICO DE SUBVENCIONS E PUBLICACIÓN DA SUBVENCIÓN CONCEDIDA.

1. No cumprimento do disposto no artigo 20.1 da Lei 38/2003, xeral de subvencións, e demais normativa de desenvolvemento, os datos da subvención concedida e a identificación da Confederación de Empresarios da Coruña serán remitidas á Intervención xeral do Estado, para que sexan incorporados á Base de Datos Nacional de Subvencións, coa exclusiva finalidade prevista en dito precepto e co debido respecto á protección dos datos de carácter persoal, segundo o previsto na Lei orgánica 15/1999, de 13 de decembro.

2. Asemade, no cumprimento do disposto no artigo 16.3 da Lei 9/2007, de 13 de xuño, de Subvencións de Galicia, a Deputación remitiralle a mesma información á Consellería de Economía e Facenda, co fin de que a incorpore ao Rexistro público de axudas, subvencións e convenios da Comunidade autónoma de Galicia.

3. Segundo o previsto no artigo 18 da Lei 38/2003, de 17 de novembro, Xeral de subvencións, a concesión da subvención á Confederación de empresarios da Coruña será publicada no Boletín Oficial da Provincia da Coruña e na páxina web <https://emprego.dacoruna.gal/>

4. Un exemplar deste convenio, debidamente asinado, será incorporado ao Rexistro de convenios que depende do Servizo de Contratación da Deputación.

XIII.- VIXENCIA DO CONVENIO, PRÓRROGA OU MODIFICACIÓN

1. O presente convenio de colaboración, para os efectos de imputación dos gastos, terá efectos durante un ano **desde o día seguinte á súa sinatura**, sen que en ningún caso sexan subvencionables os gastos devindicados con anterioridade á dita data e conservará a súa vixencia ata o **31 de xullo de 2027**, sempre e cando exista crédito para tal fin.

2. Previa solicitude da Confederación de Empresarios da Coruña, realizada polo menos dous meses antes da data de fin de vixencia do apartado 1, o convenio poderá ser prorrogado por acordo expreso de ambas as dúas partes tomado antes de que expire a súa vixencia inicial e previos os informes preceptivos da Unidade xestora, do Servizo de Patrimonio e contratación, da Secretaría e da Intervención da Deputación.

3. Tamén por acordo expreso de ambas as dúas partes e por causa debidamente xustificada, e previos os mesmos informes indicados no apartado anterior, o convenio poderá ser obxecto de modificación.

XIV.- NATUREZA, INTERPRETACIÓN, MODIFICACIÓN E XURISDICIÓN COMPETENTE

1. O presente convenio ten natureza administrativa e para resolver as dúbidas que xurdan na interpretación das súas cláusulas aplicaranse as disposicións contidas na Lei 38/2003, de 18 de novembro, xeral de Subvencións, e na Lei 9/2007, de 13 de xuño, de Subvencións de Galicia. Supletoriamente aplicarase a lexislación de contratos do sector público.

2. A interpretación das dúbidas e lagoas que poidan xurdir na aplicación do presente convenio corresponderalle ao Presidente da Deputación, previos os informes preceptivos da Unidade xestora, da Secretaría e da Intervención provincia

3. Corresponderalle aos órganos da xurisdición contencioso-administrativa, segundo a distribución de competencias disposta na Lei 29/1998, do 13 de xullo, reguladora de dita xurisdición, o coñecemento das cuestións litixiosas que poidan xurdir como consecuencia do presente convenio.

Faise constar que o presente convenio foi aprobado por acordo plenario de data 27 de febreiro de 2026.

E en proba de conformidade asinan por duplicado exemplar o presente convenio no lugar e data indicados no encabezamento.

O PRESIDENTE DA
DEPUTACIÓN PROVINCIAL DA CORUÑA

Asdo. Valentín González Formoso

O PRESIDENTE DA
CONFEDERACIÓN DE EMPRESARIOS DE GALICIA

Asdo. Antonio Javier Fontenla Ramil

O SECRETARIO XERAL
DA DEPUTACIÓN PROVINCIAL DA CORUÑA

Asdo. Miguel Iglesias Martínez